

Date – 25/05/2025

**Time - 7:30 -7:40Hrs
AKASHVANI AIZAWL**

REGIONAL NEWS BULLETIN

HEADLINES (MORNING)

- 1. Chief Minister Pu Lalduhoma'n Operation Sindoor hlawhtling taka neih a nih avangin Prime Minister Pu Narendra Modi lawmpuina a hlan a. Mizoram mipuiten an thlawp tlat thu a sawi.**
- 2. Union Minister of State George Kurian chuan rampum huapin ziak leh chhiar thiam tam kawngah leh infiamna kawngah Mizoram hming a langsar hle tih a sawi.**
- 3. Sports Minister Pu Lalnghinglova Hmar in kum 2036-a India in Olympic a thlen hun atan Vision Olympic 2036 hnuaiah kawng hrang hrangin Mizoram a inbuatsaih tih a sawi.**
- 4. Prime Minister Narendra Modi chuan vawiin chawhma dar 11 hian 'Mann Ki Baat' programme-ah ram mipuite hnena thuchah a sawi dawn a, tum 122-na tur a ni ang.**

<><><>

CM : 10th NITI AAYOG GOVERNING COUNCIL

Chief Minister Pu Lalduhoma'n Operation Sindoor hlawhtling taka neih a nih avangin Prime Minister Pu Narendra Modi lawmpuina a hlan a. Mizoram mipuiten an thlawp tlat thu a sawi.

Nimina New Delhi-a Prime Minister Pu Narendra Modi kaihhruai NITI Aayog Governing Council vawi 10 na ah he thu hi sawiin Chief Minister chuan sawrkar laipui hmalakna an thlawp tlat thu a sawi a, Mizoram chu tunhnaiah fully literate state-a puan a ni a. hei hian Mizoram chu chhawr tlak mihring nei tura a inbuatsaih nasatzia leh a hlawkpuizia a tilang tih sawiin hnathawh tur neilo chu za zela 2.2 % a ni a ti a, hna hrang hranga hmeichhe telna chu 45% lai a ni tih sawiin Kut themthiam kawngah khawvel huap inelnaah India aiawh thei khawpa tha Mizoram in an nei tih a sawi.

Chief Minister chuan NITI Aayog State Support Missions kaltlangin hma lakna chak takin an kalpui tih sawiin Viksit Bharat 2047 an thlen theih nan Department tin te chu an ruahmanna an theluhtir a ti a, Viksit Bharat 2047 atana an hmalakna langsar tak chu Bana Kaih Scheme a ni tih sawiin Ram hmasawna atana thawhpuitlak progress partner mi 517 an thlang fel tawh a ti a, Central scheme nena kaldun zel tura duan a ni tih a sawi.

Pu Lalduhoma chuan Mizoram kuthnathawktute tan Market Support System tha tak an kalpui a ti a. Kutkawih eizawna bultantute tan hmalakna tur remchang leh hamthatna an siam tih sawiin infiamna lamah theihna sang tak thalaiten an neih avangin naupang talent nei te zawn chhuaha, chher puitlinna tur Empowering Mizoram Sports an kalpui mek tih a sawi bawk.

Chief Minister chuan Aizawl chu a tawt chhoh zel avangin thalaite chu Primary sector atanga Industry leh Service sector lama tam zawka an luhna tur an dap a ngai a ti a, khawpui thar, mipui nuai sawm atanga nuai sawmpanga vel khawsakna tur Thenzawl-Peace City din an duh tih sawiin hemi kawngah hian Ministry of Housing & Urban Affairs in an thawhpui tha tih a sawi bawk.

<><><>

CM MET UNION TRIBAL AFFAIRS MINISTER

Chief Minister Pu Lalduhoma'n nimin khan Union Minister for Tribal Affairs Pu Jual Oram hmu in Ruihhlo ngai enkawlna hmun hrang hrang tihchangtlun dan tur an sawi.

Inkawmna ah hian Mizoram hmasawanna tur hrang hrang sawiin Chief Minister hian Mizoram tana Eklavya Model Residential School (EMRS) din belh turin a dil a, Union Minister hian lo ngaihtuhsak a intiam a. EMRS a thawk tura Mizote luh tam theih dan tur an sawidun a, Union Minister chuan hemi kawngah hian hma an lak mek thu leh, EMRS a thawk tur staff chu state chhunga mi ngei la tur leh zirtirtu pawh region wise-a recruitment kalpui turin inkaihhraina thar an duang mek tih a lo hrilh a ni.

Chief Minister hian nimin khan Union Home Minister Amit Shah leh Finance Minister Pi Nirmala Sitharaman bakah Union Minister dang te a hmu bawk a, Mizoram hmasawanna tur hrang hrang a sawipui a ni.

<><><>

UNION MoS : PRO VOLLEYBALL LEAGUE 2025

Union Minister of State George Kurian chuan rampum huapin ziak leh chhiar thiam tam kawngah leh infiamna kawngah Mizoram hming a langsar hle tih a sawi.

He thu hi nizana LPS Pro Volleyball League 2025 Final, LPS Arena Falkland-a neih a hmanpui na ah sawiin Union Minister chuan Mizoram chu ramchhungah infiamna kawngah leh ziak leh chhiar thiam tam kawngah a hmingtha mek a ti a, a lawmpui takzet tih sawiin hmasawn zel tura theihtawp chhuah turin a chah a ni.

Pu George Kurian chuan Prime Minister Narendra Modi kaihhruai sawrkarin Mizoram hmasawanna tur tam tak a ngaihtuah a ti a, hmarchhak bial hmasawn theih nan inkalpawhna kawngah hmasawanna tam tak a awm tih sawiin sawrkar laipuiin atangin hmasawanna an hmu zel dawn a ti a, Mizoram infiammi te pawh inelna sang zawk thleng thei tura tan la zel tura chahin state chhungah thalaite hmasawanna atan sawrkarin hma a la zel dawn tih a sawi.

Union Minister Pu George Kurian hi nimin khan Mizoram a rawn thleng a, vawiin hian Venghlui ah Local programme buatsaih a hmanpui bakah Raj Bhavan ah mi pawimawh hrang hrang a kawm dawn a, vawiin chawhnu hian Lengpui Airport atangin New Delhi a pan dawn a ni.

Mizoram Pro Volleyball League 2025 Final ah hian Anastasia leh Thutak Nunpuitu Team (TNT) te an intum a, Anastasia Team hi set 3 set 1 a chakin an champion a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

VERNICIA FORDII

Agriculture Department hmalakna in Khawzawl District chhunga awm, Tualpui khuaah chhungkaw 80 chuan Tung chin tumin kuminah hma an la mek.

Khawzawl DAO Pi Lallawmzuali sawi danin Tualpui khuaa chhungkaw 80 te Tung chinna turin Ralzawn leh Tek den mualah ten hmalak mek a ni a. Tung chinna tur hian ram tin 128 hmun a zau chu buatsaih mek niin Tung hi an chin hunah kum 3 chhung chu Sawrkarin a enkawlpui ang a, a kum 4-naah Sawrkarin Tung Chingtu Society kutah a hlan dawn a ni.

Tunhmaa Thing anchhe dawng tia hriat lar Tung hi tunah chuan a hralhna tur a awm reng tawh a, a kawr khehsa Tung rah Kg.1 chu cheng 50/- in lei tur an awm reng a ni.

<><><>

SPORTS MINISTER

New Delhi-a Bharat Mandapam-a Ministry of DoNER buatsaih ‘Rising Northeast Investors Summit’-ah nimin khan Minister Pu Lalnghinglova Hmar chuan thusawiin India in kum 2036-a Olympic a thlen hun atan Vision Olympic 2036 hnuaiah kawng hrang hrangin Mizoram a inbuatsaih tih a sawi.

Pu Lalnghinglova Hmar chuan hmarchhak bial chu kawng hrang hrangah khawvel mit hmuha pho tlak a awm a ti a, Mizoram chu tourism, sports leh entertainment-ah theihna sang tak a neih thu sawiin, investor-te chu Mizoram-a lo kal turin a sawm a, state dang angin a mi cheng tlem mahse infiamna leh entertainment ah rampawn thlenga dengchhuak thei engemaw zat anlo chhuak tawh tih sawiin infiammi tam tak ram tana fehchhuak an nei tawh tiha sawi.

Pu Lalnghinglova Hmar chuan, "Northeast: The New Hub of Tourism and Hospitality" thupuih thu sawiin, Hmarchhak bial chu khuarel mawina leh hnam ziarang hausakna, tourism-a theihna sang tak nei a nih bakah ASEAN ramte nena inkalpawhna tha, Act East Policy atan pawha pawimawh a nih thu

a sawi a, Mizoramin adventure tourism-ah theihna nasa tak a neih thu sawiin, Red Bull nena thawhhonaa Urban Downhill mountain bike racing buatsaih a nih leh Mizoram Christmas lawm dan chu khawvel hriata tihlar tlak a ni tih sawiin Mizoram chu Delhi aṅanga darkar hnih leh a chanve leka thlen theih a ni tawh a ti a, Aizawl khawpuia traffic discipline thatzia leh India rama state ralmuang, ziaak leh chhiar thiam tam berna state a nih thu a tarlang bawk.



DRUGS SEIZED

Central YMA chuan ni 6 kal ta chhung khan Ruihhlo thahnem tak an man a, hemi kaihhnawihah hian mi 40 man an ni bawk.

Central YMA Kumpulan hmalakna in tun hnai ni 6 chhung khan No. 4 : Hawng - 22, Tictac bur – 68 bakah Ruihhlo kaihhnawihah hian mi 40 an man tel a, Home ah mi 3 dah luh niin Excise and Narcotics kutah mi 6 hlan an ni a, Counselling class kal mi 20 an awm bawk a ni.



PM MANN KI BAAT

Prime Minister Narendra Modi chuan vawiin chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, tum 122-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

